



JORNAL

do

Parlamento Nacional

V LEGISLATURA

2.ª SESSÃO LEGISLATIVA (2020-2021)

REUNIÃO PLENÁRIA DE 25 DE MAIO DE 2020

Presidente: Ex.^{mo} Sr. Aniceto Longinhos Guterres Lopes

Vice-Presidentes: Ex.^{mos} Srs. Maria Angelina Lopes Sarmiento
Luís Roberto da Silva

Secretária: Ex.^{ma} Sr.^a Regina Freitas

Vice-Secretárias: Ex.^{mas} Sr.^{as}

SUMÁRIO

Sr. Presidente loka sessão plenária iha tuku 09 liu minuto 53 dadeer.

Antes Ordem do Dia — Leitura ba pedido justificação de falta do Sr. Deputado Ricardo Baptista (CNRT).

Iha intervenções diversas, Sr. Deputado sira hato'o assunto sira hanessan inundaçāo ne'ebé estrada, ponte, to'os no povo sira-nia natar, atraso ba pagamento subsídio durante Estado de Emergência, continua controla fronteira, aeroporto no porto, necessidade atu Governo analisa situaçāo atubele decide hodi prolonga ka lae Estado de Emergência, hadi'a mesa PN ne'ebé aat, lafaek ne'ebé tata jovem

ida iha Lautém, eletricidade ne'ebé mate beibeik iha município balu, necessidade atu acelera processo pagamento subsídio ba estudante la'ós bolsheiro iha rai-li'ur, pagamento subsídio ba uma-kain sira, possibilidade atu hadi'a estrada Baguia nian, normalizaçāo tarifária ba transporte público ne'ebé circula durante Estado Emergência, necessidade ba funcionamento filafali escola sira.

Ikusmai, Sr. Secretário de Estado da Comunicação Social responde ba preocupaçāo sira-ne'ebé Sr. Deputado sira hato'o.

Ordem do Dia — Anúncio da admissāo e baixa à Comissão de Assuntos Constitucionais e Justiça e à

Comissão de Negócios Estrangeiros, Defesa e Segurança da Proposta de Lei n.º 16/(2.ª) — Lei da Proteção Civil.

Sr. Deputado no Sr.ª Deputada sira ne'ebé halo intervenção maka Olinda Guterres (KHUNTO), Francisco Miranda Branco, Fabião de Oliveira, Dário Madeira no Mariano Fatubai Mota (FRETILIN), Francisco de Vasconcelos (PLP), David Dias Ximenes (FRETILIN), Adriano do Nascimento (PD), Joaquim

dos Santos (FRETILIN), António Maria Nobre A. Tilman (KHUNTO), Abel Pires da Silva (PLP) Cidália Mesquita Ximenes, Antoninho Bianco no Alexandrino Cardoso da Cruz (FRETILIN), Rosalina Ximenes (PLP), Silvino Adolfo Morais no José Pacheco Soares (FRETILIN).

Sr. Presidente taka sessão plenária iha tuku 12 liu 49 minuto loraik.

Sr. **Presidente:**— Muito bom dia, Srs. Deputados, Srs. Vice-Presidentes e Sr.^a Secretária.

Horas hatudu tuku 09 liu minuto 53.

Srs. Deputados, primeira sessão plenária, depois de mudança iha Presidência do Parlamento Nacional. Hanessan Ita-Boot sira assiste agora daudaun, ita iha sessão plenária ida, maibé ita-nia mesa sira-ne'e ita haree hanessan ho urgência uitoan...

Hatudu ba mesa ne'ebé naksobu iha hela kotuk, Mesa de honra ba Presidência.

Mesa agora ocupa bancada Governo ninian, anteriormente, no bancada Governo ninian, provisoriamente, ita dehan provisoriamente, tau iha oin ne'e.

Hatudu ba mesa sira ne'ebé coloca iha oin, fatin uluk redator sira mak ocupa.

Se ohin membro do Governo ruma participa karik, sira bele tuur. Mós atu antecipa iha eventuais Plenários iha semana ne'e nia laran, até Plenário extraordinário mós bele iha, bele acontece. Enquanto parte ida-ne'e...

Hatudu ba mesa ne'ebé naksobu hela.

...parte ida Mesa de honra ba Presidência nian, ha'u decide hussik hela hanessan ne'e tanba - no bancadas parlamentares hotu-hotu concorda - Mesa ida-ne'e atu hadi'a ka atu repõe hanessan situação anterior, tem que liuhossi ritual ida. Claro que hanessan ita ema cristão, ita iha ritual Igreja nian mós, sei taka ho bênção ida. Depois de confusão, depois de tensão iha Parlamento ida-ne'e iha loron rua iha semana ida liubá.

Ha'u hakarak hatete katak horibainhira, depois de eleito, tanba situação, la to'o de halo intervenção ka halo discurso ruma, mas ha'u atu adianta de'it liafuan badak ida de'it, mós hanessan mensagem ou informação ba público tomak, katak mudança Presidência ne'ebé ita hala'o ne'e nu'udar necessidade ida. Necessidade atu halo ajustamento ho dinâmica política foun no exercício atu hakotu impasse político. Mudança ida-ne'e mós nu'udar exigência ida atu evita ka contra tentativa balu atu harii situação hapara vida institucional Parlamento Nacional, atu evita ka contra atuação ne'ebé buka atu halo crise institucional iha Parlamento Nacional ne'ebé la haree ba interesse nação no povo nian. Ha'u atu hato'o de'it liafuan badak ida-ne'e antes loke sessão plenária.

Depois de mudança, hanessian ohin ha'u hatete, primeira sessão plenária, ohin iha agenda hanessian iha distinto Deputado sira-nia mesa. Iha lapso uitoan. Iha Período de Antes da Ordem do Dia, iha de'it pedido de justificação das faltas do Sr. Deputado Ricardo Baptista nian, que tuir loos tama ho intervenções diversas dos deputados. Distinto Deputado sira, la precisa aprecia parte ida-ne'e. ha'u propõe hatama kedas iha Período de Antes da Ordem do Dia intervenções diversas. Apenas informação inicial kona-ba agenda.

Nune'e, ha'u declara aberta sessão plenária de segunda feira, 25 de maio de 2020, ho agenda **Período de Antes da Ordem do Dia**

1. Pedido de justificação de faltas do Sr. Deputado Ricardo Baptista.
2. Intervenções diversas dos Senhores Deputados.

Período da Ordem do Dia

1. Destituição do cargo de Secretário e de Vice-Secretário da Mesa do Parlamento Nacional.
2. Eleição do cargo de Secretário e de Vice-Secretário da Mesa do Parlamento Nacional.
3. Anúncio da admissão e baixa à Comissão de Assuntos Constitucionais e Justiça e à Comissão de Negócios Estrangeiros, Defesa e Segurança da Proposta de Lei

Pronto, anúncio lei ida ne'ebé urgente, ne'e mak ita-nia agenda ba ohin ninian atu adianta kedas, agenda ohin nian mak ne'e. Aban nian depois de ha'u consulta ho conferência líderes bancadas, ita iha agenda pendente ida ne'ebé mak importante mós e sei hetan transmissão direita.

Distinto Deputado sira, relatório anual CAC ninian ba aban iha agenda Ordem do Dia, ne'e atu informa antes kedas. Nune'e, Sr. Deputado sira, ita tama kedas ba Período de Antes da Ordem dia, antes de ita ba iha informações diversas, pedido de justificação de faltas do Sr. Deputado Ricardo Baptista, maibé ema ne'e mós la iha. Orsida, Mesa sei halo leitura. Ha'u fó uluk ponto de ordem ba Sr.^a Deputada Olinda.

Sr.^a **Olinda Guterres** (KHUNTO):— Bom dia ba Sr. Presidente, Vice na'in-rua, Secretária da Mesa, colega Deputado no Deputada sira.

Iha ne'e, ha'u hakarak hato'o de'it ba colega sira hussi bancada haat, PLP, FRETILIN, KHUNTO no PD, hussu ba colega sira atu tama ho oras tem que hatene tama ho pontualidade.

Segundo, ha'u hakarak hussu colega deputado sira hussi FRETILIN mai assina lista presença maibé la marca presença iha-ne'e, oinsá Sr. Presidente?

Obrigado.

Sr. **Presidente**:— Tuirmai mós ponto de ordem: Distinto Deputado Francisco Miranda Branco.

Sr. **Francisco Miranda Branco** (FRETILIN):— Obrigado, Sr. Presidente.

Bom dia, Sr. Presidente, Vice-Presidente, Secretárias no Secretário de Estado.

Sr. Presidente, tanba iha sexta-feira ne'e la iha oportunidade atu tuur hamutuk ho ami-nia parceiro sira, então, iha Período da Ordem do Dia, “destituição do cargo de Secretário e de Vice-Secretário” ne'e, iha período de intervalo ami atu assenta tiha depois ami prepara administrativamente documentos hodi nune'e ita bele preenche Período da Ordem do Dia kona-ba destituição e eleição ba cargo Secretário e Vice-Secretários da Mesa do Parlamento Nacional.

Obrigado, Sr. Presidente.

Sr. **Presidente**:— Obrigado, Sr. Deputado.

Agora, iha hela Período da Ordem do Dia, iha agenda, assunto número 1 no 2 ita bele ajusta, bele muda ba sessão lokraik nian karik, para fó tempo suficiente ba bancadas parlamentares atu hatama sira-nia requerimento ho proposta, requerimento ba candidatos nian. Se concorda hanessan ne'e... Está bem. Concorda, então ita la'o ba oin. Começa kedas ho justificação de faltas.

Distinto Deputado ne'ebé atu troca mós la iha, no entanto ita halo leitura, maski la marca presença.

Sr.^a Secretária, favor halo leitura bá!

Sr.^a **Secretária da Mesa do Parlamento Nacional** (Regina Freitas):— Obrigado, Sr. Presidente.

«Requerimento de justificação de faltas.

Ex.mo. Sr. Presidente do Parlamento Nacional

Ricardo Baptista, Deputado ao Parlamento Nacional pertencente à bancada do Partido CNRT, vem requerer a Vossa Excelência que se digne considerar justificada a falta dada à reunião plenária extraordinária no dia 16 de Abril de 2020, por motivo de doença, o que faz nos termos e para os efeitos previstos nos artigos 8.º, n.º 1, alínea *b*), 2 e 3, e 5, n.º 2, da Lei n.º 5/2004, de 5 de maio, Estatuto dos Deputados, e do artigo 10 e 1, alínea *e*) do Regimento do Parlamento Nacional, publicado no Jornal da República, série 1, n.º 40, de 11 de novembro de 2009.

21 de Abril de 2020

O Deputado Ricardo Baptista»

Obrigado, Sr. Presidente.

Sr. Presidente:— Obrigado, Sr.^a Secretária.

Tuirmai, antes tama ba Período Ordem do Dia, sei iha intervenções diversas, mas se iha declaração política hussi bancadas parlamentares ruma, Mesa decide atu fó fatin ba declaração política bancadas parlamentares nian antes ita tama iha intervenções diversas. Se la iha, ita bá intervenções diversas.

Halo favor, bele halo inscrição. Por enquanto ha'u seidak iha inscrição ba intervenções diversas.

Distinto Deputado Fabião Oliveira.

Sr. Fabião de Oliveira (FRETILIN):— Obrigado.

Bom dia ba sua excelência Sr. Presidente do Parlamento Nacional, e parabéns ba Ita-Boot. Bom dia mós ba Vice na'in-rua, e parabéns mós ba Vice-Presidente Parlamento na'in-rua. Bom dia ba componentes da Mesa do Parlamento Nacional, ba Secretário de Estado, ba colegas distintos Deputados, ba rona-na'in sira hotu, ba povo Maubere Timor-Leste.

Ha'u hanoin Estado de Emergência iha tempo badak ita sei hakotu, maibé, tuir ha'u-nia haree nu'udar representante povo, ita precisa alerta nafatin. Tuir relatório ne'ebé que hassai hussi Centro Integrado de Gestão de Crise ba Covid-19 nian katak Timor-Leste zero hussi Covid-19, maibé ita haree katak ita-nia nação vizinho, Indonésia, liuliu iha NTT (*Nusa Tenggara Timur*),

tama ona ba categoria linha vermelha, liuliu iha distrito sira ne'ebé que bessik Timor-Leste, bessik Oecússi, Maliana no Suai. Ha'u haree sei iha possibilidade atu bele estende tan Estado de Emergência ba Timor-Leste atu bele evita transmissão kona-ba surto Covid-19 tama mai iha Timor-Leste.

Fronteira tolu ne'ebé mak ohin ha'u menciona, tan ne'e ha'u hussu ba Governo, se bele karik, atu estende dala ida tan Estado de Emergência maibé iha flexibilidade ba ita-nia povo, negociante ki'ikoan sira atu bele circula hodi hala'o sira-nia moris. Ha'u hussu atu continua taka fronteira terrestre, tem que taka nafatin ba ita-nia maluk estrangeiro sira ne'ebé tama-sai, no mós porto no aeroporto. Ida-ne'e, ha'u hanoin importante la halimar para evita moras Covid-19, atu la bele afeta ba ita-nia população ne'ebé mak iha Timor-Leste. Oportunidade iha dadeer di'ak ida-ne'e atu fó hanoin filafali ba iha Governo atu bele foti decisão ida iha tempo badak antes de Estado de Emergência hakotu tuir data ne'ebé determina ona.

Obrigado, Sr. Presidente.

Sr. **Presidente**:— Obrigado, Sr. Deputado.

Tuirmai: Sr. Deputado Dário Madeira.

Sr. **Dário Madeira** (FRETILIN):— Di'ak, obrigado.

Bom dia ba Presidente, bom dia ba Mesa, bom dia ba Secretário de Estado no bom dia mós ba maluk Deputado sira hotu.

Iha-ne'e, ha'u atu hato'o de'it informação balu ne'ebé durante semana rua nia laran halo público tomak, liuliu ita-nia população sira ne'ebé maka hela iha parte leste no sul, afetado tebetebes ho mudança climática ne'ebé acontece. Ida-ne'e mak hakarak atu hato'o.

Durante semana rua liubá hodi mai to'o ohin loron ne'e, parte leste ne'e ho sul udan-been sei maka'as tebes. Semana rua liubá quase acontece inundação iha fatin hotu-hotu, ita-nia população lakon sassán barak. Por exemplo iha Viqueque, Município Viqueque ne'e quase isolado ona, tanba estrada hussi Manatuto tama to'o iha Natarbora, Mota Dilor ne'e kotu. Estrada ida seluk fali hussi Baucau bá Viqueque ne'e mós kotu, Baucau bá Lospalos mós estrada kotu, Uatulári mai fali Viqueque mós estrada kotu, hussi fali Ainaro bá Covalima mós estrada kotu. Iha fatin-fatin. Ida-ne'e precisa Governo nia atenção máxima para bele haree ida-ne'e. Maibé ida urgente liu mak sassán ne'ebé comunidade lakon, hanessan iha parte Viqueque

nian, comunidade ida iha Município Viqueque vila, iha Suco Bibileo Lalerek Mutin, ida-ne'e quase bee tama to'o kedan suco ne'e nia laran, bee lori nia animal sira ba tama to'o tassi no natar sira ne'ebé mak hare sira kuda, hahú sa'e ona, bee mai lulun moos kedas hela rai issin de'it. Posto Lacluta mós estrada kotu. Fó ameaça tebes iha Posto Lacluta!

Durante ukun tinan sanulu ne'e comunidade iha ne'ebá exige, administrador posto sira exige, mas nunca halo manutenção ruma, nunca halo barreira ruma atu salva netik tiha posto ida-ne'ebé mak ameaça hussi mota ne'e. Horissehik no horibainrua ne'e quando udan boot, ba tiha duni ona, hela uitoan de'it atu lori tan comunidade bá tama hotu ba tassi. Ida-ne'e mak precisa tau atenção urgente. Ne'ebe, agora daudaun ne'e comunidade município Viqueque precisa ajuda humanitária.

Ida seluk, hanessian Deputado, representante povo nian, agradece ba ita-nia povo Timor-Leste tomak, ba juventude timoroan tomak, ne'ebé durante impasse político nia lala'ok mantém calma nafatin, hahú hatene ona oinsá mak atu bele assegura ita-nia estabilidade, oinsá mak atu contribui, colabora ba ita-nia estabilidade, unidade e paz to'o ohin loron la iha problema ruma acontece iha cidade Díli, nune'e mós iha município sira. Hanessian Deputado, ha'u sente orgulho, agradece ba povo Timor-Leste tomak.

Mak ne'e de'it, obrigado barak.

Sr. **Presidente**:— Obrigado, Sr. Deputado.

Tuirmai: distinto Deputado Mariano Mota.

Sr. **Mariano Fatubai Mota** (FRETILIN):— Obrigado, Sr. Presidente.

Ha'u-nia bom dia ba Vice na'in-rua, Secretária, distinto, distinta colega Deputado sira hotu, ba público no media ne'ebé acompanha sessão plenária ida-ne'e. Aproveita presença Governo nian iha ne'e, excelência Secretário de Estado, iha ponto rua mak ha'u hakarak hato'o ba Sr. Secretário de Estado.

Primeiro, ita hotu hatene katak depois de Estado de Emergência durante período fulan rua, iha promessa hussi ita-nia Governo atu fó subsídio ba povo kbiit-laek sira, ne'ebe ita haree katak durante ne'e sira laran-metin tebetebes ba apoio ida-ne'e. Ita acompanha katak promessa ne'ebé mak durante ne'e muda nia tempo, muda nia loron, maibé seidauk certo katak bainhira. Pelo menos bele pronuncia netik bainhira loos mak sira bele hetan direito ida-ne'e? Tanba ita hatene

katak Estado de Emergência ida-ne'e povo kbiit-laek ne'ebé moris ho fila liman, sira labele halo sira-nia atividade, tanba ida-ne'e mak sira la hetan rendimento hodi sustenta sira-nia moris. Ha'u hakarak hussu to'ok, ho presença Governo nian iha-ne'e, atu pronuncia netik ida-ne'e atu público mós hatene bainhira loos.

Segundo, hanessan ohin Sr. Deputado Dário Madeira hatete, ita hatene katak semana rua nia laran ne'e inundação acontece iha fatin barak, liuliu hussi pertença Tassi Mane nian, ne'ebé mak afeta tebetebes ba ligação entre município sira, posto sira ne'ebé mak hakotu estrada no ponte, ida-ne'e precisa duni Governo, Estado, nia atuação ne'ebé emergéncia tebetebes. Precisa mós Governo nia atuação urgéncia, liuliu ba ai-han, roupa no ai-moruk ba questão saúde ne'ebé afeta ita-nia comunidade sira ne'ebé mak foin daudaun ne'e acontece iha parte Suai to'o Lospalos ne'ebá, precisa mós tau atenção emergéncia ba ida-ne'e.

Ida-ne'e de'it mak ha'u hakarak hato'o.

Muito obrigado, Sr. Presidente.

Sr. **Presidente**:— Obrigado, Sr. Deputado.

Tuirmai: distinto Deputado Francisco de Vasconcelos.

Sr. **Francisco de Vasconcelos** (PLP):— Obrigado, Sr. Presidente.

Bom dia ba Ita-Boot, Vice, Secretária, colega distinto Deputado sira no audiéncia tomak.

Aproveita oportunidade ida-ne'e, ha'u hakarak hato'o ponto rua ka tolu, relaciona ho fase Estado de Emergência, ne'ebé aban ka bainrua hanessan ne'e ita termina. Tuir resolução Parlamento Nacional kona-ba Estado de Emergência, semana rua ita tem que halo avaliação ho Governo, maibé, tanba situação ne'ebé Parlamento Nacional enfrenta, ita la consegue halo avaliação, rona direta exposição, explicação ruma hussi Governo kona-ba oinsá, ita atu estende ou lae. Maibé ita mós hatene katak ita iha avanços, ita iha sucesso, parabéns ba Governo ne'ebé ho limitação buat hotu-hotu, mas consegue ita-nia população sira ne'ebé infeta ba surto covid-19 recuperado hotu ona. Mas ne'e la'ós katak ita contente ona, tanba ita acompanha iha mundialmente, iha nação barak epicentro ne'e sa'e. Então, mesmo ita la consegue halo debate avaliação ida ho Governo, aban ka bainrua termina ona Estado de Emergência, maibé ho referéncia hussi nação sira, liuliu Indonésia, ne'ebé to'o ohin loron número ne'e sa'e maka'as, ne'e ita tem que tau mós consideração ba ida-ne'e. Karik se ita termina ona Estado de

Emergência mas linhas fronteiras terrestres, hanessan Oecússi, Maliana no Suai, ne'e ita tau controlo ne'ebé máximo, tau ossan ba sira para que ita-nia população sira ne'ebé hakarak hakat liu mai labele liu hussi dalan ilegal, sira bele liu via ne'ebé formal atu nune'e bele hetan atendimento hussi médico sira.

Sr. Presidente, hanessan ohin colega sira acrescenta ona, iha semana ida-ne'e nia laran iha inundação maka'as, hanessan iha fatin hirak-ne'ebé mak ohin distinto Deputado sira cita ona, maibé ha'u mós simu mensagem hussi população sira hussi Same, quase 200 uma-kain, ne'ebé afeta ba inundação. Hussu ba Governo, de facto ita iha período duodecimal, maibé oinsá Governo bele facilita sira. Tanba informação katak barak mak uma estraga, sassán sira lakon hotu. Ha'u hanoin, Governo tau atenção ba ida-ne'e.

Ikusliu, Sr. Presidente, situação iha Parlamento Nacional, dala ida tan, mesmo iha semana ida nia laran, iha semana ida liubá iha fatin ida-ne'e, iha distúrbio; em nome do Partido da Libertação Popular (PLP) hussu desculpa ba povo tomak iha território laran tomak. Mesmo hanessan ne'e, mas população sira maduro liu, juventude sira maduro liu, iha sira-nia compreensão hodi entende saida mak jogo democrático. Fatin ida-ne'e, Uma Fukun-Parlamento Nacional, fatin ida-ne'e só ko'alia de'it kona-ba democracia, iha fatin para ita tuur, ita ko'alia, continua povo fó fiar nafatin, Estado tau matan nafatin ba ita-nia população sira, iha qualquer problema ne'ebé Estado ne'e enfrenta, Estado sei la lakon, Estado la rende ba intenção tentativa oioin ne'ebé cria instabilidade iha ita-nia nação, ita la iha razão para repete ema seluk nia sala, ita la iha razão para repete nação seluk nia sala, ita só iha dever, ita só iha responsabilidade oinsá assegura ita-nia estabilidade, cria paz ba ita-nia população atu nune'e lori desenvolvimento ba ita-nia povo tuir ita ida-idak nia promessa ba povo iha período campanha.

Ha'u hanoin ida-ne'e de'it mak ha'u hato'o, Sr. Presidente.

Obrigado barak.

Sr. Presidente: — Obrigado, Sr. Deputado.

Tuirmai: distinta Deputada Olinda Guterres.

Sr.^a Olinda Guterres (KHUNTO):— Repete filafali, Sr. Presidente.

Ohin, tanba ponto de ordem ne'e ohin ha'u la hato'o parabéns ba Ita-Boot. Iha oportunidade ida-ne'e hakarak fó ha'u-nia parabéns ba Ita-Boot, ne'ebé iha tempo liubá Ita-Boot tuur iha Ita-Boot nia fatin tun mai kraik. Agora, ami hatuur filafali Ita-Boot iha Ita-Boot nia fatin, parabéns.

Parabéns mós ba Vice na'in-rua ne'ebé nafatin mantém posição no Secretária ida, e uitoan tan ita bele aumenta tan ita-nia Secretária da Mesa.

Pronto, Sr. Presidente, ita-nia povo agora hein hela dala ruma sira telefone ha'u iha kalan boot: «bainhira mak ossan ida U\$ 100,00 ne'e bele to'o iha ami-nia liman?» Ha'u hateten ba sira: ne'e la'ós Chefe Suco ida, Chefe Aldeia ida, ne'ebe Governo hakarak lailais ohin hamriik ba ne'e entrega ba iha Chefe Suco nian hotu lailais, mas ne'e, rihun-rahun hanessian ne'e, Governo tem que fera ulun.

Ida tan fali estudante sira hussi rai-li'ur mós telefone mai ha'u dehan katak «ami estudante sira iha ne'e bele hetan hotu subsídio ne'e ka lae?» Ne'e, ha'u hateten ba sira «ha'u ladún hatene maibé ha'u koko liga to'ok ba Sr. Ministro Fidelis Magalhães». Ne'e duni, iha loraik ne'e duni ha'u telefone ba Sr. Magalhães, dehan katak sira hetan hotu maibé cada ema ida \$800, se la sala ba ema ida. Se la sala. Ne'ebe hussu ba Governo atu labele halo fo'er ita-nia Governo nia naran, saida mak Governo hatete tem que cumpre, tanba buat promete ne'e, ema dehan buat ita ko'alia ona ne'e tem que selu duni, ida-ne'e mak dehan katak Governo ne'e Governo moos. Ha'u comunica mós ba Sr. Dionísio Babo, dehan katak dala ruma la iha karik... Lae. Sr. MNEC (Ministro dos Negócios Estrangeiros e Cooperação) dehan katak iha, maibé sira agora hein ne'e bainhira. Ida-ne'e mak hussu ba Governo precisamente tau matan ba sira ne'ebé escola iha li'ur, iha nação sira seluk oin seluk, maibé liuliu sira iha Melbourne ne'e buat hotu karun, horibainhira ami bá iha ne'ebá buat hotu karun, ne'ebe se saida karik estudante sira agora hein hela iha ne'ebá.

Ha'u mós hussu ba Sr. Presidente, situação ida-ne'ebé mak foin daudaun acontece, ha'u hakarak hato'o iha-ne'e, política nia lala'ok mak hanessian ne'e, ita nafatin unidade, partido hira-hira ne'ebé mak iha Parlamento ida-ne'e ita considera malu nafatin, ita kaer liman hamutuk nu'udar colega Deputados e Deputadas nafatin iha Parlamento ida-ne'e.

Ha'u mós louva ba Polícia, F-FDTL sira ne'ebé mak sira-nia serviço durante ida-ne'e, la'o loraik e kalan sira mós la descansa tanba de'it jeito política iha Parlamento ida-ne'e nian e Governo nia laran.

Ha'u mós hakarak fó parabéns ba Doutor sira ne'ebé mak hala'o serviço Covid-19 nian mak to'o agora ita-nia povo Timor-Leste, ba ita tomak, nunca hetan moras aat ida ne'ebé hanaran

coronavírus e nem ema ida mate, ha'u fó parabéns ba doutor saúde sira ne'ebé mak hala'o serviço iha Timor-Leste.

Ha'u mós agradece ba Sr. Secretário de Estado, foin daudauk ha'u ko'alia kona-ba bee moos ninian, quase dala haat, dala lima, ha'u foti iha-ne'e tanba povo iha Hera ne'ebá ne'e precisa tebetebes bee moos, maibé Ita-Boot sira fó e hala'o duni ona no bee mós sai duni, ha'u fó obrigada barak. Hodi povo Hera nia naran ha'u hato'o agradece wa'in ba Ita-Boot ninia serviço no contribuição ne'ebé mak halo ba povo, liuliu povo Suco Hera ninian.

Ida-ne'e de'it mak ha'u hakarak hato'o, Sr. Presidente.

Muito obrigada.

Sr. Presidente: — Obrigado, Sr.^a Deputada.

Tuirmai: Sr. Deputado David «Mandati».

Sr. David Dias Ximenes «Mandati» (FRETILIN): — Obrigado, Sr. Presidente.

Bom dia ba maluk Deputado sira hotu.

Iha-ne'e ha'u atu hato'o de'it katak Governo tem que lais, e tem que lais duni, porque uluk ita atu estende por segunda vez ita-nia estado de emergência ponto principal ne'ebé ita reivindica mak subsídio ba ita-nia ema sira-ne'e.

Karik ha'u atu dehan tan katak tem que buka tuir impedimento ne'e iha-ne'ebé mak to'o ohin loron subsídio ne'e seidauk to'o iha ita-nia maluk sira, ne'e tem que lais, Sr. Secretário de Estado. Ida-ne'e pertinente ho emergente, tem que lais.

Ohin loron ita mós bele haree katak Covid-19 iha Timor to'o ona zero, maibé ita hatene mós katak nação vizinha sira começa aumenta, ida-ne'e bele perigoso tebetebes mai ita. Agora ita-nia povo hein hela, karik ita atu estende mas sira la iha buat ida iha uma atu han, sira mak sei hussu ita para labele estende, e perigoso tebetebes. Atraso ne'e seidauk iha explicação mai fali Parlamento ida-ne'e, ne'ebe tem que lais, karik bele.

Oinsá ita atu estende estado de emergência ida-ne'e ne'ebé perigosidade ne'e sei iha quando buat ida-ne'ebé atu fó condição ba ita-nia ema atubele bele moris, embora ho insuficiência, to'o ohin loron seidauk. Fulan rua ona mak ita la'o hanessan ne'e, ne'e tem que lais para ita-nia povo labele halerik nafatin.

Ida-ne'e mak ha'u hakarak hat'o, e depois ita sei haree tuir tan saida mak ita-nia Governo halo, ida-ne'e mak ita tem que hussu para nia halo nafatin hodi previne Covid-19 ida-ne'e.

Obrigado, Sr. Presidente.

Sr. **Presidente**: — Obrigado, distinto Deputado.

Tuirmai: distinto Deputado Adriano do Nascimento.

Sr. **Adriano do Nascimento** (PD): — Obrigado, Sr. Presidente.

Ba dala uluk ha'u hakarak hat'o parabéns ba Ita.

Segundo, ha'u hakarak hat'o mós parabéns ba Governo, liuliu Gabinete Gestão Crise, ne'ebé que serviço extraordinário hodi trata moras ne'ebé que ita-nia alin sira cidadão Timor-Leste lori ho sira-nia issin hussi Nação seluk mai iha Timor-Leste. Dedicção ida-ne'ebé que extraordinária tanba ne'e mak ha'u hanoin merece atu hetan parabéns hussi ita, liuliu hussi amiania Partido.

Ida seluk, ohin maluk Deputado sira mós ko'alia ona kona-ba estado de emergência ne'ebé que atu hotu, ha'u hanoin ita precisa haree didi'ak, atu estende ou la estende ne'e precisa análise didi'ak, e Governo tem que explica ho didi'ak para Deputado sira bele compreende, liuliu buat ne'ebé que ita hatene mak ita-nia nação vizinho ne'ebé que loron ba loron caso positivo sa'e ba beibeik.

Iha Indonésia, se la sala, loron ida bele liu ona rihun, nune'e mós iha sorin, NTT (*Nusa Tenggara Timur*), mós sa'e ba beibeik, ne'e atu hat'o sinal ba ita katak ita tem que cuidado an, decisão ida-ne'ebé que ita foti ha'u hanoin ita tem que haree didi'ak ita-nia fronteira. Fronteira ne'e fronteira tassi, leten, lalehan, ho rai, para ita bele haree avião saida mak mai iha ita-nia rain tem que cuidado e ha'u hanoin Governo tem que tau atenção máximo e agora daudauk halo hela, liuliu fronteira iha Suai, Oecússi no Bobonaro.

Ha'u fiar katak Governo halo hela análise e Gabinete Gestão Crise ha'u hanoin serviço hela para sira bele mai ho sira-nia relatório ne'ebé que ita bele foti decisão ida-ne'ebé que di'ak ba ita-nia rain. Maibé ita mós tem que haree situação moris povo nian, ha'u hanoin Governo tem que hola mós medidas e ita hotu tem que hola política ida para depois de fulan rua moris povo nian iha Timor-Leste ita tem que haree no fó solução alternativa ruma ne'ebé que povo bele moris.

Liuliu liga ba subsídio ba ne'ebé atu fó maibé to'ó agora mós seidak fó, hussu ba Governo atu explica: dificuldades ne'e saida? Tanbassá mak to'ó agora seidak bele fó? Povo sira hein hela tanba situação difícil tebetebes atu sossa ai-han ba sira.

Ne'ebe, ha'u hanoin Governo bele explica, se dí'ak liu karik Parlamento bele organiza para Gabinete de Gestão Crise bele mai explica buat sira-ne'e hotu, desenvolvimento moras iha itania nação vizinho no mós nação sira seluk, ao mesmo tempo bele fó mós relatório kona-ba execução ossan no mós preparação ne'ebé que iha.

Ida seluk, ha'u hanoin Governo no ita hotu bele buka meios políticos atu haree mós inundação, desastres naturais ne'ebé que acontece daudauk ne'e, ponte barabarak kotu, dalan kotu, ho buat sira-ne'e hotu. Povo mós barak mak bee tama sira-nia uma, ha'u hanoin Governo tem que organiza ona e hussi Parlamento bele mós acompanha, Comissão competente bele acompanha, comunidade sira, liuliu sira ne'ebé que moris iha costa sul to'ó leste.

Ita iha situação difícil duni, moras ne'ebé que ita la espera nune'e mós desastre naturais, mudança climática no buat sira ne'ebé que mai iha itania rain, e itania situação política mós lori ita e ne'e mós hanessan teste ba itania maturidade política nu'udar líder atu hola decisão ida iha situação ida-ne'ebé que difícil tebetebes.

Ba ida-ne'e ha'u hanoin ha'u-nia intervenção mak ne'e.

Muito obrigado, Sr. Presidente.

Sr. Presidente: — Obrigado, Sr. Deputado.

Tuirmai: distinto Deputado Joaquim dos Santos.

Sr. Joaquim dos Santos (FRETILIN): — Obrigado, Sr. Presidente.

Bom dia.

Ha'u atu ko'alia ba problema inundação ho atraso de pagamento ba social, maibé colega sira ko'alia hotu ona, Sr. Presidente, ha'u secunda de'it Deputado Dário, Deputado Mota, Deputado Adriano ho Deputado Vasconcelos, ne'ebe ha'u retira de'it.

Obrigado.

Sr. Presidente: — Obrigado, Sr. Presidente.

Tuirmai: Sr. Deputado António Nobre.

Sr. António Maria Nobre A. Tilman (KHUNTO): — Obrigado, Sr. Presidente.

Bom dia ba Ita-Boot, ba componentes da Mesa, ba Sr. Secretário de Estado, ba caros colegas Deputados, ba mídia no ba audiência tomak.

Aproveita oportunidade ida-ne'e atu hussu mós ba Sr. Presidente Parlamento Nacional kona-ba situação ita-nia Mesa Presidente do Parlamento Nacional.

Ha'u haree imagem ne'e ladún di'ak tanba ne'e mak ha'u hussu Sr. Presidente no Sr.^a Secretária-Geral atu oinsá mak acelera processo ritual atubele tau fali Mesa em condições para ita-nia Plenária ne'e funciona fali normal. Partido KHUNTO defende cultura nu'udar ita-nia identidade, tanba ne'e mak ita labele continua la'ó ho situação ida-ne'e. Ita tem que haree processo ne'e para depois bele serviço iha Plenária e iha-ne'e bele la'ó ho di'ak, ha'u lakohi iha implicação hussi Mesa Presidente nian ne'ebé rahun e bele dificulta Deputado sira ne'ebé hala'ó knaar iha Parlamento Nacional. Tanba ne'e liuhossi processo ritual ida antes de Parlamento hala'ó nia knaar, tanba ne'e mak dala ida tan ha'u hussu ba Sr. Presidente karik bele fó to'ok hanoin bainhira mak processo ne'e bele la'ó e normaliza fali sala Plenária hanessan normal.

Segundo, ha'u mós hakarak secunda colega Deputado sira seluk kona-ba inundação e ha'u atu hussu mós Sr. Secretário de Estado iha-ne'e, ação urgência ne'ebé mak halo ona ba população sira, liuliu iha suco Lalerek Mutin, Suco Bibileo, ne'ebé enfrenta inundação iha fim-da-semana ne'e? Ação urgência saida mak foti ona ba ita-nia população, tanba ita hatene katak bee sa'e rai ne'e estraga fali comunidade nia ai-han, ai-horis, natar, to'os, e agora sira enfrenta hela situação ida difícil tebetebes, hussi parte Governo assistência saida mak fó ona ba ita-nia comunidade, ita-nia população iha área ne'ebé afetado? E oinsá mós atuação hussi Governo nian kona-ba estradas no ponte sira, intervenção saida mak halo ona? Ne'e situação ida urgência, emergência, precisa ação ida urgente.

Tuirmai, iha fim de semana ha'u mós hussu... Iha suco Kairui, iha oportunidade ida-ne'e hakarak hato'ó ba Ministério Comércio e Indústria, liuliu CLN (Centro Logístico Nacional), população sira iha-ne'ebá ho situação emergência sira labele fa'an sira-nia produto local, liuliu hare, tanba ne'e mak hussu ba CLN karik bele bá to'ó iha-ne'ebá hodi sossa sira-nia produto local, liuliu hare, atu nune'e bele facilita sira hodi bele sustenta sira-nia vida loron-loron.

Iha mós exigência katak comunidade iha-ne'ebá ne'e seidauk sente ukun an ne'e halo nu'ussá, tanba liuliu sira iha agricultura, sira sei continua halai natar ne'e ho karau de'it, hussu karik Ministério da Agricultura bele apoio netik *hand tractor* ruma ba sira. Ida-ne'e mak pedido hussi ita-nia comunidade sira, hussu Sr. Secretário de Estado bele hato'o to'ok ba iha Ministério da Agricultura para bele tau atenção ba comunidade sira iha-ne'ebá.

Nune'e mós sira iha Kribas, sira to'o agora seidauk hetan acesso ba bee moos. Oinsá mak Ministério bele tau atenção atu ita-nia comunidade sira-ne'e bele hetan bee moos. Iha tempo uluk hetan ona, mas agora aat hotu ona, oinsá Governo bele tau to'ok hanessan prioridade ba iha plano para ita-nia comunidade sira bele hetan bee moos iha área Kribas nian.

Ha'u hanoin ida-ne'e mak ha'u-nia intervenção.

Obrigado, Sr. Presidente.

Sr. Presidente: — Obrigado, Sr. Deputado.

Tuirmai: distinto Deputado Abel Pires.

Sr. Abel Pires da Silva (PLP): — Obrigado, Sr. Presidente. Bom dia ba Ita-Boot, bom dia ba composição da Mesa no mós bom dia ba colega sira hotu, bom dia ba Sr. Secretário de Estado.

Parabéns ba Ita-Boot, ba eleição iha semana kotuk. Ha'u mós hakarak hato'o parabéns ba povo doben Timor-Leste tomak tanba semana kotuk ita celebra loron restauração independência ba dala 18, tinan ida que tama ona ba idade maturidade.

La haluha hato'o mós parabéns ba Na'i Primeiro-Ministro no componente Governo tomak, liuliu Centro Integrado Gestão Crise, tanba Timor-Leste ohin caso detetado ne'e zero ona. Ida-ne'e hatudu katak medida tomak ne'ebé durante ne'e Governo, liuhossi Centro Integrado Gestão Crise, implementa ne'e iha duni nia resultado. Tanba medida sira-ne'e iha duni nia resultado, então ita labele hapara medida sira-ne'e, tanba ne'e mak ha'u hanoin ita precisa atu continua implementa para gere situação ne'e didi'ak tanba ita haree vizinho tolu, Austrália, Indonésia no mós Singapura, ne'ebé Timor iha relação direita ne'e, agora daudauk sira sei sofre, crise ne'e aumenta hela de'it. Indonésia, semana kotuk loron rua tuituir malu, deteção caso foun ne'e bessik rihun ida, 21 no horissehik ka horibainrua, iha maio. Ne'ebe, ne'e la iha necessidade ba Timor para atu reduz fali medida sira ne'ebé durante ne'e hala'o. Ida-ne'e ita tem que tau hanoin, e ha'u hanoin ha'u sei nafatin fó parabéns ba *front liner* sira, ita-nia mídia, ita-nia médico sira,

enfermeiro sira, ambulância, sira ne'ebé halo serviço *cleaner*, sira ne'ebé serviço iha laboratório, parabéns ba Ita-Boot sira hotu, maibé ita tem que continua.

Agora, kona-ba udan boot iha parte Tassi Mane iha semana kotuk, ponte barak mak colega Deputado sira hato'o tiha ona, mas ha'u hakarak hato'o tan ponto rua, liuliu iha Município Covalima, suco rua maka sempre hetan inundaçã: Suco Suai Loro, ne'e tanba sira hela bessik mota Tafara nia ain, então barreira ne'ebé naksobu sempre lori bee ba tama too iha sira-nia natar, sobu sira-nia uma. Ida fali mak Suco Belecassa to'o Suco Beco, dalan ida-ne'e tanba iha construção autoestrada, bee dalan atu halai liu ba mota ho halai ba tassi ne'e mak bloqueado, então dala barak quando volume udan ne'e boot, bee sa'e fali ba iha sira-nia fatin. Tanba ne'e mak, ha'u hanoin precisa medida atu halo fali prevenção ba fatin rua ne'e, ida bessik mota Tafara no ida bessik autoestrada ne'e.

Ida fali mak iha Município Baucau nian, ita iha instalação importante ida, irrigação no *bendungan* iha suco Lari Sula, Posto Baguia, tanba udan boot iha semana kotuk estraga tiha instalação ida-ne'e, e natar bessik hectares 600 maka afetado. Agora, hussu ba parte Governo atu halo intervenção lailais, tanba ida-ne'e liga mós ba povo nia moris loroloron nian.

Ha'u hanoin informação hussi ha'u mak ida-ne'e de'it, obrigado barak.

Sr. Presidente: – Obrigado, Sr. Deputado.

Tuirmai: distinta Deputada Cidália Mesquita.

Sr.^a Cidália Mesquita Ximenes (FRETILIN): – Obrigada ba Sr. Presidente.

Ha'u-nia bom dia ba Mesa, Presidente Parlamento Nacional, Vice e Sr. Secretário de Estado, ba colegas distintas no distintos Deputado sira hotu no ba mídia sira hotu ne'ebé ohin acompanha iha Plenário ida-ne'e.

Iha-ne'e ohin colega sira ko'alia hotu ona kona-ba inundaçã ne'ebé acontece quase iha município tolu ka haat parte leste ne'ebá, maibé acontecimento horissehik-horibainrua iha Lospalos, Suco Home, lafaek tata ita nia jovem ida ho naran Boni, nia lakon horibainrua, e horissehik mak foin mak família ho comunidade sira ba buka e hetan nia issin mate. Jovem ne'e ho idade 20 anos, nia foin fila hussi Irlanda, acontecimento ne'e iha Muapitine, Iralalaru. Ne'ebe, ha'u hanoin buat ne'e acontece beibeik, Sr. Secretário Estado bá hato'o ba Ministério relevante, ne'e precisa tau atenção beibeik tanba quase ita hotu hatene, ita-nia hotu acompanha,

katak iha Lospalos ne'e sempre acontece. Ne'ebe, ha'u hussu dala ida tan ba Sr. Secretário de Estado para bá hato'o hela, encaminha hela, ba Ministério relevante hodi fó atenção e halo prevenção ba assunto ida-ne'e. E mós ohin colega sira ko'alia ona kona-ba inundação iha Lospalos, ita hotu hatene no acompanha iha mídia *Facebook*, iha-ne'e ha'u ko'alia mós kona-ba Iliómar, ne'e acontecimento ha'u hanoin Ita-Boot hatene, iha-ne'ebá quase semana rua ressin *listrik* mate. To'o agora população sira iha ne'ebá loke quiosque, e sira iha sassán hanessan geleira iha uma laran, sira sai estraga hotu, e mós ita atu contacta ba família sira mós ita la bele hetan tanba ahi mate. Iha ne'ebá, tuir informação ne'ebé ha'u hetan, quase ai-riin 12 maka monu, e balu rai halai be kle'uk ona. Ne'ebe, ha'u hussu ba Governo tem que tau atenção ba buat ne'e.

E mós iha mós parte Maluhira ne'ebá, Ita-Boot hatene, iha-ne'ebá dalan entre Darafnasi ne'e monu, aat, ne'ebe agora daudauk população iha-ne'ebá ho jovem sira ajuda malu bá taka. Taka para carreta sira, hanessan emergência ida, bele liu bá-mai. Ne'ebe, hussu ba Ita-Boot, bá hato'o hela ba Governo.

Kona-ba *listrik*, alin balu foin horissehik hussi ne'ebá mai, katak ita-nia população no ita-nia comunidade sira iha-ne'ebá hakarak atu bá serviço hamutuk atu hadi'a ai-riin *listrik* sira ne'e, maibé funcionário EDTL ne'ebé coloca iha Iliómar, razão saida mak sira seidauk hatán, ha'u hanoin ida-ne'e Ita-Boot tem que bá hato'o para bele tau atenção lailais.

E ita hotu hatene katak agora daudauk Governo atu fó ona subsídio ba ita-nia estudante sira ne'ebé iha rai-li'ur, não-bolseiro, ne'ebé fulan hirak liubá ita debate iha-ne'e katak atu fó, maibé labarik sira iha-ne'ebá, estudante sira iha-ne'ebá, agora daudauk balu mensagem mai katak to'o agora sira hein-hein, maibé processo ne'e to'o ona iha-ne'ebé. Ha'u hanoin Governo, ba ida-ne'e, precisamente tem que acelera lailais tanba labarik sira iha rai-li'ur, la'ós iha ne'e. Iha-ne'e karik, ita bessibessik, ita-nia comunidade ne'ebé iha dificuldade ba hahán ruma, ita bele fó apoio, maibé agora, coitado, ita-nia oan sira iha dook ne'ebá, precisa Governo acelera lailais liuhossi Ministério ne'ebé toma conta ba assunto ida-ne'e.

Ha'u hanoin ha'u-nia intervenção mak ida-ne'e de'it, obrigada.

Sr. **Presidente**: – Obrigado, Sr.^a Deputada.

Tuirmai, distinto Deputado Bianco.

Sr. **Antoninho Bianco** (FRETILIN): – Bom dia, Presidente, bom dia Vise ho *Sekretaris*, membro Governo, colega Deputado sira hotu no maluk sira ne'ebé acompanha, karik iha transmissão direta.

Primeiro, ha'u agradece ba Maromak tanba situação bele perigo iha mundo, afinal Maromak fó bênção ba timoroan sira, rai ida-ne'e, COVID mós mate hotu. Ha'u hanoin ita agradece ba Maromak, tanba Na'i Maromak nia intervenção liuhossi serviço ne'ebé ita iha, hussi bênção sira-ne'e mak ohin loron COVID, ita bele dehan sira tama duni mas to'o fim sira mós mate. E ha'u hein katak sira sei la da'et tan. Maibé, ita mós agradece através ita-nia maluk sira ne'ebé halo esforço hodi combate, ne'e agradece!

Segundo, agradece ba povo, afinal ita tem que aprende lição boot ne'ebé povo sira hanorin mai ita. Ne'ebe, ita sira iha-ne'e, hussi líder ne'ebé de'it, ita tem que aprende lição di'ak ne'ebé povo hatudu. Mesmo que situação difícil, maibé sira hatudu sira-nia hahalok, relação humana ne'ebé di'ak, metin, cria paz, hakmatek iha sira-nia leet hodi hatutan sira-nia moris hodi hala'o serviço.

Terceiro, Governo ho Parlamento, sé de'it, identifica problema ne'ebé agora daudauk ita atravessa: udan boot, mota boot, anin boot, afeta povo! Ida, sira ne'ebé vítima tanba natar mota lori. Natar sira ne'ebé, balu, ita bele dehan sira sura de'it loron atu ko'a, então ne'e tem que buka identifica - katak desastre ne'e bá buka sira, la'ós sira buka atu tane liman - sira-nia natar ne'ebé bee lori ne'e hira, para selu fali sira. Ha'u hanoin tem que selu, ba ha'u-nia hanoin tem que selu! Tanba sira la'ós tuur-tuur atu hussu de'it, maibé sira halo ona atu natar ne'e, atu dehan de'it produz tiha ona, maibé mota lori. Tem que sukat, hectare hira, saida ne'e, tem que selu fali. Governo sei bele selu!

Rua, sira balun ne'ebé ko'a haree hotu tiha ona, atu dulas de'it ona, maibé mota mai lori hotu, ida-ne'e Governo tem que buka e tenta atu hatene sira lakon hira, tem que selu ida-ne'e. Ne'e la'ós sira atu tane liman, sira buka produz, ita hanu'ussá mak bele... Tanba sira ko'a tiha ona, tau tiha ona, e mota lori hotu kedas. Ida-ne'e ita bele buka e tenta atu resolve sira-nia problema.

Hanessan hotu natar, balu ita bele dehan uma, hanessan iha Suai ho sira seluk ne'e, uma sira-ne'e la'ós sira tuur-tuur mak messak bolu anin, bolu bee, bolu mota, maibé desastre tama, sira-nia uma bá hotu. Ah, ida-ne'e tem que identifica katak oinsá mak recupera fali sira-ne'e. Situação ida-ne'e sira la hanoin, pronto, ita buka tenta. Se ita consegue resolve balu ne'ebé iha-ne'e, sira iha foho ne'ebá ne'e, sira hein ita-nia intervenção, liuliu ita Deputado sira iha-ne'e, Governo, ita fó dados ba malu e bele buka tenta resolve.

Tuirmai, ita liga ba ponte no estrada. Ha'u hanoin ponte ho estrada ne'e, buat balu ha'u-nia colega Adriano hatete beibeik iha-ne'e, maibé agora ne'e grave liu, ne'e 5 quilómetros iha Suai, mais de 400 metros, ne'ebé de'it autoestrada. Agora ha'u hanoin tem que buka dalan to'ok, sé mak sala, e ita buka to'ok oinsá mak bele resolve questão ida-ne'e. Agora carreta la bele liu, *motor* de'it mak bele liu, maibé ne'e mós perigo.

Ponte sira kotu iha Same, ha'u hanoin Same nian ponte hitu mak kotu. E pronto, ponte sira kotu ne'e, halo totalmente parado. Hanessan iha Fatuberliu tolu, depois iha Same laran rua, Alas rua ho tan sira seluk. Ne'e ha'u hanoin ita tem que lais se buat ne'e emergência. Ida agora ne'e mak ita bele dehan emergência, ida-ne'ebá mak intervenção emergência.

Pronto, ha'u hanoin hussu mós ba Governo, se questão emergência, ossan COVID sira, ketahalobé regras la iha emergência, então afeta ba execução. Ita-Boot sira tem que buka tenta, tanba COVID nia ossan ne'e, regra emergência. Agora, lei fó emergência, Ita-Boot sira la aplica emergência, ossan ne'e bele la usa. Di'ak liu aproveita para oinsá usa hodi resolve problema sira ne'e, tanba ita haree ita-nia equipa sira bá ne'e, *Task Force* ka, maibé *Task Force* mós carreta la iha, hanessan de'it! Ha'u bá to'o iha fatin-fatin, *Task Force* maibé carreta dalaruma empresta tun empresta sa'e, hanu'ussá mak ita bele resolve. Questão ida-ne'e Segurança nian, Defesa ho Segurança nian, buka tenta atu resolve regra especial para bele executa orçamento ne'e, pronto, hodi resolve problema ne'e. Ha'u hanoin hirak-ne'e hotu ita bele dehan, bele mós ita hakmaan intervenção ita-nian hodi bele tulun ita-nia população iha-ne'ebá. Tanba situação agora, se *Task Force* sira COVID nian, carreta la iha, ema situação difícil, ne'e ita hanu'ussá? Ne'ebe, ida-ne'e bele haree to'ok. Equipamento hussi *task force* sira hussi Ministério das Obras Públicas hanu'ussá mak resolve problema sira-ne'e, pronto, ida-idak ho ossan COVID ne'ebé iha, e ministério sira ne'ebé la usa, buka tenta para bá fali Ministério seluk atu resolve problema ne'e, assunto social! Hanessan agora ne'e, questão ida udan, anin, mota, ne'e assunto social mak barak liu ona, e depois assunto infraestrutura ne'ebé ohin, ita bele hatete katak, se ida-ne'e la consegue intervém diretamente, paralisado. Ne'e la'ós emergência ba COVID lae, emergência por natureza ne'ebé mai agora ne'e, *malah* ita *kewalahan*.

Pronto, ida-ne'e mak ha'u fó hanoin, e aproveita mós atubele hussu katak tempo to'o ona atu prepara orçamento ne'ebé tem que lailais, tanba Governo agora tem que apresenta orçamento rua: ida 2020 nian e ida fali 2021 nian. Ne'ebe, Governo tem que buka tenta prepara ona, elabora ona, ossan atu lori mai, pronto, além de questão de emergência ne'ebé estado emergência sei prolonga tanba situação ne'ebé ita hatene katak país vizinho afetado. Ita hein katak reza barak tan para sira bele afetado e ita lalika afetado.

Obrigado barak, Presidente.

Sr. Presidente: – Obrigado, Sr. Deputado.

Tuirmai: distinto Deputado Alexandrino Cardoso.

Sr. Alexandrino Cardoso da Cruz (FRETILIN): – Obrigado ba Presidente.

Bom dia ba Presidente ho Secretária, Vice-Presidente na'in-rua, Ex.^a Secretário de Estado, ba colega Deputado sira hotu.

Em princípio, questão sira-ne'ebé ha'u-nia colega Deputado sira foti, ha'u concorda, maibé ha'u precisa ko'alia tanba ha'u la'ós rona informação hussi ema, haree hussi mídia social, maibé ha'u tun direta ba iha terreno. Impacto hussi udan boot semana rua-tolu liu ba kotuk afeta ba comunidade barak iha município lima hanessan ohin colega sira menciona, maibé ha'u ko'alia especial liu ba iha Covalima tanba ha'u bá haree hodi matan, iha município seluk ha'u la haree hodi matan, ha'u la bele ko'alia.

Iha Covalima, kona-ba inundação ne'ebé afeta ba povo nia moris, liuliu povo sira-ne'ebé mak hela iha Suco Suai Loro, Camanassa, Labarai, Posto Tilomar, Maudemu, *perbatasan* ho Mota Massin no mós Posto Zumalai, Suco Tasilin, Aldeia Galitas, ne'ebé inundação estraga sira-nia produto sira ne'ebé durante ne'e sira colheita ona hanessan: batar ho hare. Hanessan mós ohin camarada Bianco menciona ona, katak balu iha processo ko'a hela, hare butuk hamutuk hela iha natar laran, maibé la consegue foti tanba mota lori hotu. Ida-ne'e Governo precisa haree. Depois, kona-ba batar ne'ebé sira colheita ona, rai iha uma, maibé udan, bee boot tama sira-nia uma estraga hotu sira-nia ai-han sira-ne'e.

Problema tanbassá mak bee sa'e hodi estraga sira ai-han sira-ne'e, estraga mós uma? Tanba hanessan mós ohin Deputado balu questiona katak mota Tafara nia barreira ne'e naksobu, então bee halai hotu ba iha parte Suai Loro e mai to'o iha Camanassa. E razão seluk mós, tanba construção estrada ne'ebé durante ne'e Governo halo, nia bee dalan ka *saluran* ne'e ki'ik loos, depois bee sai fatin la iha, então bainhara udan boot bee tama filafali ba iha comunidade nia uma, ida-ne'e mak hodi estraga comunidade nia uma no mós estraga sassán hotu.

Mai iha parte Suco Matai, ha'u rassik bá iha-ne'ebá maibé carreta la bele liu, e comunidade iha-ne'ebá hanessan isolado bainhira tempo udan, tanba durante ne'e quando tempo udan, mota boot, sira atu bá mercado utiliza de'it dalan ida ne'ebé liu hussi Aldeia Lohorai mai iha aeroporto nian, depois hodi utiliza estrada principal ne'ebé liu hussi Camanassa. Maibé, iha-

ne'ebá ponte ki'ik ida atu ultrapassa ida-ne'e kotu tiha, então *motor* sira mós ema hulan de'it, carreta labele halo movimento iha-ne'ebá, então ne'e hanessan isola fali comunidade iha Suco Matai laran rassik atu acesso ba mercado ka ba serviço fatin. Tanba ida-ne'e mak iha tempo badak hussu ba Ministério das Obras Públicas atu haree lailais questão ida-ne'e. Liga ho ponte, ponte Lomea kotu ona, ha'u hanoin carreta mós labele liu, tanba agora daudauk, horikalan mós udan boot nafatin. Ne'ebe, hussu ba Governo, Ministério relevante sira atu haree questão ida-ne'e ho sério.

Liga fali ho estado de emergência, ha'u concorda ho razão sira ne'ebé apresenta ona hussi ha'u-nia colega sira, liuliu colega Fabião, katak Timor-Leste ne'e ita precisa duni estende tan estado de emergência tanba ita iha fronteira direta ho Indonésia, Timor Ocidental, ne'e fronteira ho tassi, lalehan ho rai maran. Maibé, ho ita-nia força segurança sira ne'ebé nia número limitado, la bele atu taka 100% dala ilegal sira-ne'e. Tanba ida-ne'e mak iha razão mós atu estende tan estado de emergência.

Tuirmai, tanba ita-nia equipamento saúde mós ita haree mínimo tebetebes, tanba ida-ne'e Timor-Leste hela loron ida ka rua atu remata ona estado de emergência nia tempo, ne'ebe ba oin ita hanoin didi'ak, Governo hanoin lissuk, para depois bele estende tan ba iha estado de emergência.

Ikusliu, kona-ba eletricidade. Povo contente iha parte ida tanba hetan pulsa gratuito durante fulan rua, maibé iha parte balu mós povo sente triste tebes tanba eletricidade ne'e dalaruma mate to'o kalan haat ka lima mak foin bele moris filafali. Nia fukun loloos ne'e iha-ne'ebé? Tanba ne'e mak hussu ba Governo, Ministério relevante, atu haree didi'ak questão ida-ne'e.

Liga ho impacto hussi udan ne'e, agora povo sente preocupado loos tanba ai-han sira estraga hotu, tanba ne'e mak Estado, Governo, tem que prepara condição. Ho ida-ne'e subsídio ba uma-kain, 100 USD ne'e, tem que ser acelera, tem que ser haree didi'ak nia fukun ne'e iha-ne'ebé, tanbassá mak Parlamento aprova ona ossan ne'e ba fulan rua, maibé to'o ohin loron pagamento ne'e seidauk realiza. E povo kbiit-laek hein hela, halerik hela, ba questão ida-ne'e. Ne'ebe, ha'u hanoin ida-ne'e mak ha'u bele hato'o iha biban ida-ne'e.

Obrigado barak.

Sr. Presidente: – Obrigado, Sr. Deputado.

Sei iha tan Deputado tolu, Mesa decide taka ona inscrição. E agora ita la'o ba oin, ha'u completa lai intervenção Deputado na'in-tolu nian ba intervenções diversas.

Distinta Deputada Rosalina Ximenes, halo favor.

Sr.^a **Rosalina Ximenes** (PLP): – Obrigado ba tempo.

Bom dia ba Presidente e parabéns ba Presidente foun, parabéns mós ba Vice na'in-rua ne'ebé la'ós foun maibé issin moras, *Sekretaris* no mós bom dia ba distinto Deputado sira hotu.

Ha'u-nia intervenção, ohin Deputado sira ko'alia hotu ona kona-ba estado emergência ne'ebé atu remata, maibé ha'u sugere ita bele hatún nia grau de'it, abertura uluk grau rua, agora bele reduz ba grau ida, exemplo: ema bele bá halo to'os ka, halo natar ka, movimento iha rai-laran bele movimenta, hanessan transporte público, maibé fronteira ka aeroporto bele taka nafatin.

Hussu mós ba Governo atu halo lailais ona pagamento subsídio ba povo, e ita iha ita-nia dados balun, exemplo iha dados bolsa da mãe ho dados idoso sira-nian.

Hussu mós ba Governo atu haree inundação ne'ebé foin acontece iha semana kotuk atu tau mós prioridade, liuliu ai-han ba povo kbiit-laek sira.

Ikusliu, população Município Baucau, Posto Administrativo Laga ho Baguia, hussu atu hadi'a sira-nia estrada ne'ebé hanessan iha inferno nafatin. E sira dehan município sira seluk nia estrada ne'e tama hanessan ita tama ona lalehan, maibé sira hussi Laga ba Baguia nian nafatin hanessan tama ba inferno nian, ne'ebe, sira dehan, sira-nia liman ne'e nafatin iha leten. Ne'ebe, hussu Governo ida-ne'e bele esforço lailais atu ajuda sira, para sira mós sente katak sira bele ukun-an ona, sira mós sente ita ukun-an ona. Sira mós hussu tan katak iha sira-nia Suco Atelari, sira-nia aldeia ida iha-ne'ebá, uluk iha Região I, to'o agora sira seidauk hetan eletricidade, sira dehan sira seidauk ukun-an ida. Se bele karik Governo ida-ne'e, Governo foun ida-ne'e, sira telefone ba ha'u katak ida-ne'e monu ona ba FRETILIN, PLP, KHUNTO ho PD nia liman be, se bele acelera lailais hodi ajuda netik sira bá, sira mós hetan netik eletricidade bá.

Ida-ne'e mak povo nia aspiração ne'ebé hato'o mai ha'u, ha'u hato'o de'it ida-ne'e.

Obrigada.

Sr. **Presidente**: – Obrigado, Sr.^a Deputada.

Tuirmai: Sr. Deputado Silvino Morais.

Sr. **Silvino Adolfo Morais** (FRETILIN): – Obrigado ba oportunidade.

Bom dia ba Presidente, composição Mesa, Sr. Secretário Estado, colegas Deputado sira, audiência no mídia. Bom dia ba ita hotu.

Uluknanain, ha'u hakarak fó parabéns ba povo Timor-Leste ne'ebé foin daudauk celebra loron restauração da independência 20 de Maio nian, no mós parabéns ba maturidade política cidadania ne'ebé povo Timor-Leste tomak hola durante semana ida-ne'e nia laran bainhira mossu acontecimentos iha fatin ida-ne'e.

Segundo, ha'u mós fó parabéns ba família boot muçulmano iha mundo tomak, liuliu iha Timor-Leste, ne'ebé celebra sira-nia loron boot horissehik.

Tuirmai, ha'u hakarak fó hanoin badak ida kona-ba situação coronavírus iha Timor-Leste, ne'ebé dehan katak atu estende ka la estende. Ha'u hakarak dehan ba ita hotu katak Estados Unidos da América agora hassa'e bandeira meia haste, tanba sira considera sira-nia nação agora triste boot. E depois ita Timor-Leste agora sente katak ita aliviado, maibé ita mós tem que hanoin katak ita-nia vizinho Indonésia nia dados ne'ebé to'o horissehik, katak afetados coronavírus iha Indonésia hamutuk 22 271, e di'ak ona 5402, mate ona 1372. Iha NTT, *Nusa Tenggara Timur*, afetado 79, e mate ona ema ida. Ne'ebe, ha'u hanoin ita Timor-Leste mós tem que cuidado. Depois, ha'u hanoin, notícia ne'ebé iha mídia social dehan katak *epicenter* ne'ebé agora iha América ne'e, agora tun falu mai iha América do Sul, liuliu iha Brasil. E depois iha hanoin katak la kleur tan *epicenter* ne'e sei mai iha Ásia. Agora, se ita la cuidado, ita contente ho situação ne'ebé agora iha, depois ita atu lakohi estende ita-nia estado de emergência ida-ne'e, ha'u hanoin quando loron ida ema ida mate tanba coronavírus iha Timor-Leste, liuliu iha Díli de'it, ema seidauk fuik hotu, cidade Díli ne'e sei maten.

Tanba ida ne'e mak ha'u hanoin estado de emergência ne'e precisa estende tanba razões ne'ebé ohin ha'u dehan. Maibé, atu estende mós, ha'u hussu para, se bele Governo ne'e, fronteira ne'e tem que taka. Fronteira aérea, rai maran, tassi nian tem que taka. Ha'u haree, ha'u ema ne'ebé moris iha fronteira, ita bele dehan taka, maibé ami-nia área iha-ne'ebá ne'e, área fronteira ne'e, ema bolu dehan Taliban, área Taliban! Área ne'ebá ne'e ema bá-mai di'ak hela, ema tama-sai di'ak hela. Tanba saida? Ha'u hanoin número ita-nia forças ne'ebé atu fó apoio iha-ne'ebá mak sei menos, tanba ne'e mak ema sei la'o bá-mai hela, ita haree katak situação ne'e, liuliu iha fronteira Mota-Ain to'o iha Balibó ne'ebá. Tuir Administrador Balibó nia hanoin katak, se atu ema la bele bá-mai fronteira ne'e, para ita-nia força sira, ita-nia polícia sira, la bele haree, então uma-kain sira-ne'ebé bessik kedas iha fronteira, la liu hussu 50 m ou 2 m ou 3 m de'it, di'ak liu sira-ne'e tem que hassai, atu nune'e provisoriamente ita bele trava, mais ou

menos, infiltrações ne'ebé iha. Tuirmai, agora daudauk ne'e transporte público ne'ebé iha, ha'u dehan de'it Díli-Maliana agora 15 USD. Ha'u la hatene ida-ne'e, uluk seidauk tempo emergência ne'e Díli-Maliana 6 USD, agora sa'e ba 15 USD, ne'ebe ha'u hanoin Governo haree to'ok bá. E razões ne'ebé condutor autocarro sira-ne'e dehan, tanba Governo dehan katak tula de'it 12 pessoas, tanba ne'e mak sira halo folin ida-ne'e. Maibé, ida-ne'e permanente ka lae? Tanba saida? Tuir ha'u-nia haree, bainhira autocarro sira-ne'e, *bis* sira-ne'e, to'o iha Batugadé, ha'u haree nakonu, maibé selu 15 USD.

Ha'u hanoin tanba tempo mós to'o ona, ha'u hussu para, se bele, Parlamento ne'e bolu Governo mai atu ita hussu responsabilidade ba sira kona-ba implementação COVID-19 nian ne'e.

Obrigado.

Sr. Presidente: – Obrigado, Sr. Deputado.

Ikusliu: distinto Deputado José Pacheco.

Sr. José Pacheco Soares (FRETILIN): – Obrigado, Presidente.

Bom dia ba Presidente, ba Vice na'in-rua, Secretário, Sr. Secretário Estado, colega Deputado no Deputada sira, povo doben Timor-Leste.

Ha'u atu fó de'it sugestão ida ba Sr. Presidente. Liga ba acontecimento semana kotuk ne'e ita bele considera katak ita nia uma ida Timor ita harii iha 2002 ne'e, ita mai ho ai-riin haat metin, maibé ai-riin ida maka tohar iha semana kotuk ne'e. Ai-riin ida tohar ne'e la'ós nia tohar rassik maibé ita mak silu fali. Ida-ne'e mak Presidente preocupa katak se ita silu fali, ita tem que buka lia-na'in ida mai hamulak fali hodi harii fali ai-riin ne'e para ai-riin haat ne'e hodi completo hodi assegura ita-nia rain ne'e. Então, ha'u-nia sugestão mak ne'e, Presidente, karik bele, Presidente preocupa de'it ema técnico ida halo mesa foun ida tiha. Segundo, haree de'it lia-na'in ida, nia bele representa, ida ne'ebé bele mai hamulak hodi harii fali ai-riin ne'e. Tuir ha'u-nia compreensão katak Deputado sira representa mai hussi município ne'e, ne'e lia-na'in ne'ebé mai hussi Município 13 mak ne'e, odamatan boot ne'e mak iha Díli ne'e. Presidente confia de'it ema kuku ida para hamulak, e representante mak Deputado sira-ne'e. Nia la'ós representa povo de'it, representa uma-lulik mós mak mai ne'e. Ne'ebe, sira representa, para pelo menos ita-nia atividade iha Parlamento ne'e funciona normal ona, mesa ne'e labele nune'e hela,

semana oin ita bele usa ona mesa foun ne'e. Ha'u hanoin, ida-ne'e mak ha'u fó ha'u-nia sugestão de'it, Presidente preocupa buat rua de'it: técnico halo mesa foun ida, ida ritual ne'e haree kuku ida hodi hamulak e ema lia-na'in mak Deputado sira ne'ebé representa nia knua-knua mai ne'e. Sira hein de'it fó relatório ba knua sira katak ai-riin ne'ebé tohar iha semana hotuk ne'e, ne'e metin tiha filafali ona. Ida-ne'e primeiro.

Segundo, ba estado emergência, ha'u dirige ba Sr. Secretário-Estado, karik estende ka la estende, maibé keta haluha katak bele funciona atividade normal, liuliu ba iha educação. Tanba se iha ita-nia rai-laran, ita-nia alin sira recuperado hotu ona, então bele funciona fali educação. Tanba ita labele hanoin de'it katak educação ne'e acesso hussi *online*, ema povo kbiit-laek sira-ne'e sira la iha material eletrónica, atu bele *online* hanu'ussá? Karik bele funciona fali educação para labarik sira labele sai vítima.

Ikusliu, parabéns ba parte hotu-hotu iha Governo, ba hotu-hotu nia esforço durante hassoru estado emergência ba fulan rua ne'e. E agradece ba povo doben Timor-Leste tanba mesmo que sira enfrenta problema oioin, sira sente hamlaha tanba sira sofre ba estado emergência, maibé sira paciência hodi bele hein hela Estado nia tulun.

Obrigado.

Sr. Presidente: – Obrigado, Sr. Deputado.

E obrigado ba distinto Deputado sira hotu ne'ebé ohin intervém iha parte intervenções diversas, ne'ebé barak liu foca ba estado de emergência. Ohin iha-ne'e, iha sessão plenária ida-ne'e, Governo mós marca presença, Sr. Secretário de Estado da Comunicação Social iha-ne'e e sei bele hatán.

Sr. Secretário Estado, desculpa, bem-vindo, ohin ami hahú uluk tiha, Ita-Boot mai atrasa, maibé la impede ami Mesa atu hato'o bem-vindo ba Ita-Boot. Ha'u hanoin Ita-Boot rona rassik saida maka ohin Deputado sira ko'alia, mais ou menos, se ha'u la sala karik, barak liu foca ba estado de emergência ne'ebé estende dala rua ona. Orsida ha'u sei fó tempo ba Sr. Secretário Estado atu responde ba preocupações. Deputado sira mós fahe sira-nia informações kona-ba questão sira seluk, liuliu kona-ba situação em geral.

Antes fó ba Sr. Secretário de Estado, ha'u mós atu hatán e fó informações kona-ba assunto ne'ebé dirige mai Mesa. Ida kona-ba situação mesa, estrago sira ne'ebé ita iha ne'e. Ha'u, ita hotu, ha'u hanoin quando mídia, câmara ho transmissão direta foca mai ne'e, ne'e halo ita moe, halo ita moe, mas, pronto, buat ne'e acontece tiha ona, claro que ita hotu-hotu hatene

acontecimento ida-ne'e, ne'e mós constitui crime, então ema ne'ebé halo ne'e tem que responsabiliza mós, responsabiliza! Ba ida-ne'e iha sexta-feira liubá ha'u fó informação ba Sr. Distinto Deputado sira kona-ba oinsá atu hussu responsabilidade ba ema ne'ebé comete crime ne'e, polícia hussi PNTL, Unidade Investigação, mai hahú, inicia ona investigação, sira mai hassai hotu ona dados, que processo kala sei la'o, ne'e processo justiça nian. Agora, hussi ita-nia parte, hanessan ohin rona mós Deputados sira, até iha conferência líderes bancadas mós, bancada hotu-hotu, menos bancada sira ne'ebé la presente, momento ne'e Bancada CNRT, Bancada UDT/FRENTI-MUDANÇA ho Bancada PUDD, hotu-hotu fó sira-nia opinião katak precisa duni hala'o ritual ida antes de ita normaliza fatin ba presidência Parlamento nian.

Agora daudauk Mesa nia prioridade loloos mak atu normaliza funcionamento hanessan baibain. Ohin hahú plenária, iha semana nia laran ne'e atividade comissão sira mós tem que la'o. Ami nia prioridade mak ida-ne'e ba semana ida-ne'e. Mesmo assim, atu hanoin kedas ona ko'alia ho Governo, atu coordena ho Governo, liuliu Secretaria Estado Cultura, atu ko'alia kona-ba ida ritual ne'e. Parece ne'e precisa plano ida, se ita dehan fukun ka, ita dehan lissan ka, ou dehan cultura ne'e, hussi suco ba suco seluk mós iha diferença, e hussi subdistrito ida ba subdistrito seluk, sá tan distrito. Então, para bele representativo liu, mais representativo, claro que hotu-hotu la bele mai, mas ami hanoin hela bele representa 12 Municípios ho RAEOA iha nia representação ida mai. Por exemplo, Ainaro, atu Soru-Craic maka atu representa ka, orsida sira iha-ne'ebá mak tem que iha tuur hamutuk ida, sé loos mak atu representa. Tanba buat ne'e la'ós hanessan cerimónia baibain, cerimónia ida que ita hakarak halo depois de acontecimento ida ne'ebé ema mundo tomak... Então ema hotu-hotu preocupa. Ema hotu-hotu preocupa dehan Uma-Fukun tiha ona, maibé agora sira sobu bá, sobu mai, Mesa ida fukun iha-ne'ebá mós sobu ne'e, atu responde ba preocupação ida-ne'e, ba ema barak ninian, em hotu-hotu assiste, iha acesso ba mídia, ne'e mak ami hanoin dehan, pelo menos iha representação hussi 12 Municípios ho RAEOA nian. Kala la barak, mas tem que organiza, tem que organiza, claro que lori mós custo, então ami tem que halo plano ida, mas ami prevê katak pelo menos iha fulan ida nia laran ita bele realiza ida-ne'e. Mas, ideal liu ba ha'u, ohin ha'u ko'alia tiha ona ho Vice-Presidente na'in-rua, ideal liu, tanba Sessão Legislativa hotu iha 15 de julho, então ritual ida-ne'e mós atu halo iha 15 de julho, aproveita taka ho cerimónia ida-ne'e para ita tama sessão legislativa foun ne'e, ita tama ho foun depois de hetan bênção hussi Padre, ka ita sei organiza cerimónia ida que di'ak. Por enquanto, ami-nia plano mak ida-ne'e, la bele kleur demais, hanessan compromisso ida ne'ebé hato'o hussi Deputado sira liuhossi representantes bancadas, ohin Deputado sira balu mós ko'alia tan, começa iha semana ne'e nia laran mós ami atu traça plano tanba tem que ser lori hussi Distrito sira ne'e mai, então tempo que lori tempo uitoan. Ha'u hussu paciência uitoan,

apesar de ita moe mas buat ne'e acontece hotu tiha ona. Se ita hakarak bá halo metin, parece lia-na'in sira ou fukun sira mai tem que oinsá motiva ita Deputados, ita político sira, para se bele hakotu kedas forma ka... Ita-nia comportamento sira hanessian ne'e di'ak liu hakotu kedas. Nia dimensão ka saida maka ita hakarak halo ne'e, parece mais compreensivo, ida-ne'e la'ós objetivo para mai hanessian halo cerimónia oficial ida, maibé oinsá mak bele fó nia sentido ida atu resolve oinsá atu hadi'a ita-nia relação política sira-ne'e, liuliu atu assegura Parlamento ida-ne'e, loloos, dehan Uma-Fukun duni, ita hotu-hotu respeita. Quando ita hakarak ko'alia, tanba Deputado ida-idak, nia representa nia partido, nia representa nia interesse política, bele halo saida de'it atu atinge ninia interesse maibé ida saida ne'e. Então, ami sei coordena ho Governo atu hala'o ida-ne'e, hanessian atu implementa compromisso ida ba atu halo ritual.

Kona-ba estado de emergência, tanba liga ho serviço Parlamento nian, antes ha'u fó ba Secretário Estado, horibainhira iha quinta-feira iha conferência líderes bancadas, ha'u pronuncia, ha'u hatete ba Governo katak Governo tem que cumpre lei Regime Estado de Emergência ne'ebé tem que 15 em 15 dias hato'o relatório. E relatório ida-ne'e la depende ba atu estende ka la estende, tanba lei ne'e haruka. Parlamento tem que ser mantém informado, lei dehan hanessian ne'e, então 15 em 15 dias nia implementação ne'e Governo tem que hato'o relatório, e ida-ne'e la depende ba estende ou la estende. Agora atu estende de certeza que, hanessian ohin Deputado sira barak ko'alia, tem que iha avaliação ida ho análise profunda, karik estende mós tem que iha justificação ida ne'ebé di'ak, loos, maibé buat hotu orsida depende ba Governo. Ha'u atu avisa de'it ida ohin relatório ne'e lori Parlamento nia naran, tanba ida-ne'e lei mak haruka, Governo precisa haree didi'ak atu conclui ho relatório hanessian informação, sá tan hela de'it loron hira para ita atu decide estende ou la estende. Portanto, ida-ne'e mak ha'u hakarak halo, hanessian reação Mesa ninian.

Mas, antes fó ba Sr. Secretário de Estado, iha ponto de ordem ida. Sr. Deputado Abel, halo favor.

Sr. Abel Pires da Silva (PLP): — Obrigado, Sr. Presidente.

Sugestão de'it, karik atu halo renovação, se bele Mesa ba Presidente no ba Vice ne'e halo hussi bessi de'it, para aban bainrua ne'e la iha tan ema hanoin atu bá sobu fali.

Obrigado.

Sr. **Presidente**: — Ami hanoin hela atu haree... La usa bessi, mas usa ai ida-ne'ebé, ai hanessan idêntico ho cultura Timor nian ne'e mais ou menos saida, mais representativo.

Ponto de ordem. Sei kona-ba Mesa ka, Sr. Deputado? Halo favor.

Sr. **Adriano do Nascimento** (PD): — Sr. Presidente, ha'u hanoin ita-nia hanoin atu halo cerimónia cultural ne'e iha loke sessão legislativa ne'e di'ak, só que ha'u-nia preocupação, iha fulan hira nia laran quando ita halo Plenária depois hussik mesa aat ne'e iha kotuk, ne'e mós haruka mensagem ba público, iha Timor laran no mós internacional, ladún furak. Sim, ita hakarak hahú buat ida foun ho moos, ida-ne'e mós, mas questão imagem Estado ninian sá tan ita halo reunião solene ida iha-ne'e e depois iha ita-nia kotuk ne'e mesa ida hanessan ne'e, ne'e hatudu mensagem violência ne'e ba iha público. Ha'u hanoin ida-ne'e sai hanessan ha'u nia preocupação. Ne'e ida.

Segundo, karik atu halo, atu tau mesa foun, ha'u iha sugestão ida ba Presidente, ida ita rai nafatin mesa ho cadeira ne'ebé ita soe ba malu hodi rahun ne'e, tau iha museu. Tanbassá? Iha Mesa ida-ne'e nia leten mak Constituição Rain ida-ne'e nian assina e Mesa ida-ne'e mós mak hahú hanessan fundação Nação ida-ne'e ninian, liuliu iha Parlamento, tanba ne'e mak ita tem que cuida buat sira-ne'e lai, e ida-ne'e mós parte hussi história Nação nian, liuliu história Parlamento nian.

Ha'u hanoin ha'u-nia hanoin mak ida-ne'e.

Muito obrigado.

Sr. **Presidente**: — Obrigado, Sr. Deputado.

Tanba ponto ida ikus ne'e, ne'e mak ha'u haruka sira, nia posição ida-ne'e lalika muda para fó oportunidade ba ema *cameraman* ka saida para halo ninian posição ida hanessan ne'e bele documenta didi'ak que antes de, se ita hadi'a, depois bele serve hanessan documentação museu ka saida ruma, ou ida-ne'e mak bele muda iha fatin ruma ba iha museu. Então, ninia posição ne'e tem que hanessan ne'e lai para fó oportunidade ba ema sira, ita-nia autoridade competente sira bele haree ida-ne'e.

No entanto, ita halo nafatin ritual ne'e, ha'u hola conclusão katak se lais liu di'ak liu. Hanessan ne'e? Está bem.

Outro ponto de ordem: distinto Deputado David «Mandati».

Sr. **David Ximenes** «Mandati» (FRETILIN): — Obrigado, Presidente.

Atu continua de'it saida mak ohin distinto Deputado Adriano dehan, agora ida-ne'e processo jurídico la'ó hela, iha processo ninian procedimento ne'e mak hanessian ne'e duni. Ne'ebe ita hein tan uitoan, para além de ita ko'alia kona-ba ita-nia cultura, ida-ne'e processo legal ne'ebé ita tem que hein uitoan até que sira be kaer processo ne'e fó resposta ruma mai ita.

Segundo, ha'u mós atu dehan katak ohin ita-nia maluk Deputado Pacheco ko'alia kona-ba representatividade de'it, maibé ha'u haree ita tem que honesto uitoan katak destruição da Mesa iha e Mesa ne'e uluk atu tau iha-ne'e iha ninia cerimónia rassik. Ha'u hatene katak difícil tebetebes e difícil duni atu bolu tan fali ita-nia ema sira mai, mas ita halo bá mak sira la mai, mas ita la bele halo fali representatividade porque quando ita ko'alia kona-ba cultura, ita hotu hatene katak ninia manas ne'e oinsá. Ne'ebe, la iha ema ida iha-ne'e hakarak sai fali vítima ba buat ida-ne'e.

Terceiro, ohin como ema Suai-oan mós ko'alia kona-ba nia rain, ema Iliómar nia oan mós ko'alia kona-ba nia rain, ema Viqueque-oan ko'alia kona-ba nia rain, ha'u ema Baguia ha'u mós ko'alia uitoan. Ita-Boot sira haree estrada Baguia iha kedas *Facebook* sira-ne'e, oinsá ha'u la hatene. Uluk kedas ha'u ko'alia ida-ne'e mas ema dehan fali katak ha'u moe la iha be ha'u nonook tiha fali, mas agora como hotu-hotu ko'alia be ha'u mós teri netik bá, temi netik bá, sé mak sente an Baguia ninia oan karik sente bá, keta iha Governo laran mós iha Baguia nia oan karik sente an bá, para hadi'a mós Baguia ninian porque uluk Governo português nia tempo mós Baguia nia estrada mak hanessian ne'e nafatin, Indonésia nia tempo, então Baguia ne'ebá ne'e base de apoio tan be nia pior liután. Agora fali oinsá, ah, ida-ne'e ha'u la hatene tan ona, ita hotu-hotu hamutuk hodi hanoin.

Ha'u obrigado de'it ba Suai-oan ida-ne'ebé ohin ko'alia kona-ba irrigação Baguia, Lari Sula ninian, obrigado boot ba nia, ha'u mós atu defende fali autoestrada Suai ninian oinsá, ita hotu-hotu hanoin hamutuk.

Obrigado boot ba Presidente, obrigado boot ba Sr. Abel, Suai-oan.

Muito obrigado.

Sr. **Presidente**: — Obrigado, Sr. Deputado.

Kona-ba representatividade cultura nian ne'e ami regista hela ida-ne'e oinsá mak ami haree bainhira mak ita decide atu halo cerimónia ne'e.

Agora, tuirmai kona-ba estrada ka buat sira hotu ne'ebé ohin Deputado sira ko'alia ne'e, mai ita rona Governo, hussi Sr. Secretário de Estado da Comunicação Social.

Sr. Secretário de Estado, halo favor, tempo Ita-Boot nian.

Sr. **Secretário de Estado da Comunicação Social** (Merício Juvinal Akara): — Obrigado, Sr. Presidente.

Respeito ba Sr. Presidente, Vice na'in-rua no Deputado sira hotu.

Primeiro, fó parabéns ba Sr. Presidente no Vice na'in-rua, Governo pronto atu colabora ho Ita-Boot bainhira de'it precisa.

Preocupação, comentário ne'ebé ohin Ita-Boot sira hato'o, balun ha'u bele fó informação agora, balun ha'u sei transmite depois ministério relevante bele fó informação tan.

Liga ba Estado emergência ne'ebé ohin maioria ko'alia, semana kotuk Governo rona ona informação hussi Centro Integrado e agora daudaun ne'e Conselho Ministro encontro hela, seidauk hotu, mas claro katak depois de encontro Conselho Ministro sei hato'o decisão oficial kona-ba estende ka lae, maibé iha semana kotuk depois de ita rona informação hussi Centro Integrado, ita orgulho tanba ita la iha ona caso. Maibé, seidauk bele contente tanba vírus ne'e seidauk lakon, coronavírus ne'e sei iha, caso mak la iha ona, mas vírus ne'e sei iha. Iha mundo ne'e sei iha, iha nação hotu-hotu, inclui ita, sei enfrenta.

Ohin ami rona Ita-Boot sira-nia preocupação maioria fó razão forte precisa estende, ami hanoin ne'e razão forte maski orsida depois de Conselho de Ministro mak sei fó decisão oficial, maibé iha possibilidade ita estende.

Ponto segundo, kona-ba impacto inundação, impacto udan-been ne'ebé acontece maka'as iha parte Leste, Suai, no mós conforme informação balun, liuliu ohin ita-nia população balun nia uma iha Viqueque mak hetan estragos. Ha'u foin simu informação hussi MSS (Ministério da Solidariedade Social) katak sira halibur ona dados, iha tempo badak ajuda ne'e sei to'o.

Kona-ba ponte, estrada, Ministério das Obras Públicas bá halo ona intervenção. Exemplo Ita-Boot sira haree katak Lospalos iha ponte ida kotu, iha momento ne'ebá MOP halo intervenção no agora bele usa, normaliza fali ona e resto processo hotu sei la'o.

Kona-ba eletricidade ne'ebé mate iha posto Iliómar, ha'u mós foin simu informação hussi Ministro Obras Públicas katak EDTL halo hela intervenção, espera tempo badak bele mós resolve, inclui estrada ne'ebé kotu ho problema sira seluk. Então, ministério relevante informado e balu foin informa ha'u katak equipa halo hela nia serviço.

Kona-ba subsídio, liuliu liga ba pacote recuperação económica, em princípio ami hakarak dehan katak processo sei continua la'ó, ita sei selu, hanessian USD 100 mak ema hotu sempre ko'alia, apoio ba estudante sira. Em princípio sei executa tuir plano, ita tem que reconhece iha dificuldades balu mak ita enfrenta duni, hanessian ohin ita-nia Deputado balu ko'alia katak ita agora iha situação emergência, ne'ebe sistema balun tem que ajusta. Então, equipa sei haree ne'e lailais e Primeiro-Ministro orienta ona iha encontro Conselho Ministro semana kotuk para tem que acelera e hotu-hotu tem que serviço, se bele sábado no domingo mós serviço para impedimento sira-ne'e bele resolve iha tempo badak. Ne'ebe, em princípio política ne'e loos ona, ne'e sei selu, la'ós dehan lae, tempo maka karik mak sei saida uitoan e mós ita tem que hatene recuperação económica ne'e katak nia processo continua, acontecimento ruma ita continua recupera to'ó sai normal. Ne'ebe, processo ne'e sei la'ó hanessian ne'e, ne'ebé seidauk iha decisão ida dehan cancela, processo la'ó atu realiza duni saida mak Ita-Boot sira rona durante ne'e.

Base de dados, ita-nia equipa técnico sira tem que *cross-check*, maibé iha ona instrução para dados balun iha ita sei avança E depois keta iha preocupação balun ita continua resolve, ho hanoin ida-ne'e mak ami fiar katak processo sei to'ó nia rohan maski ita tem que reconhece tarde uitoan.

Ha'u hanoin informação hirak-ne'e maka ha'u bele fó e informação sira seluk ne'ebé Ita-Boot sira ohin hato'ó, ha'u seidauk iha informação, ha'u sei relata ou transmite ba ministério relevante depois fó fali informação ba Ita-Boot sira.

Mak ne'e de'it, obrigado barak, Sr. Presidente.

Sr. Presidente: — Obrigado, Sr. Secretário de Estado.

Srs. Deputados, ita iha 11 h e 36 min, se permite ita hala'ó kedas agenda ba Ordem do Dia nian, antes de ita bá intervalo ba *snack* ka ba almoço kedas. Karik hodi fó tempo ba Bancadas Parlamentares prepara candidatura ba Secretária ninian, parece ne'e sei di'ak liu.

Sei iha ponto de ordem ida iha-ne'e antes de ha'u taka: Distinto Deputado Mandati.

Sr. David Dias Ximenes «Mandati» (FRETILIN): — Obrigado mais uma vez.

Sr. Secretário de Estado, ida be Ita-Boot dehan katak sei demora, buat ne'e ita iha contexto de emergência, ida-ne'e ita sei demora la iha ona significado buat ida be subvenção ka ossan be ita atu fó ba ita-nia cidadão sira-ne'e. Buat ida be emergência ne'e, aprova orçamento ne'e, iha

carácter de emergência. Agora, durante dois meses ne'ebé emergência ninian to'o ohin loron ita seidauk fó e depois ita atu aumenta tan, e realmente situação ne'e eminente, situação ne'e eminente ne'ebé perigosidade coronavírus ninian mai bessik-bessik tan ita.

Agora, ita atu selu ne'e difícil la halimar, no entanto, ita atu prolonga, ita encara situação dilemática ida-ne'ebé ita hotu-hotu la hatene ita atu halo nu'ussá. Agora, serviço Estatal ninian ne'e la'o halo nu'ussá mak ohin loron sai fali buat ida hanessian ne'e, emergência sai fali tiha normal.

Ha'u hussu ba Secretário de Estado hato'o ba Conselho de Ministros katak ida-ne'e iha carácter de emergência tem que trata ho emergência. Carácter de emergência tem que emergência duni, labele naran de'it ka termos de'it mak emergência, mas ita atu fó decisão ne'e hanessian fali normal, ne'e la loos. E ami sei insiste ida-ne'e todas as semanas ne'ebé Ita-Boot sei mai iha-ne'e.

Muito obrigado, Sr. Presidente.

Sr. Presidente: — Obrigado, Sr. Deputado. Sr. Secretário de Estado kala sei regista Ita-Boot nia preocupação.

Sr. David Dias Ximenes «Mandati» (FRETILIN) — Muito obrigado.

Sr. Presidente: — Srs. Deputados, se concorda ita bá kedas agenda tuirmai: halo admissão ba Proposta de Lei, Lei da Proteção Civil. Proposta lei ne'e liga ba comissão rua: ida, ne'ebé mais essencial, baixa ba Comissão B atu hussu relatório e parecer, iha prazo 15 dias, no ba Comissão A, maibé tem que haree mós halo apreciação, hato'o parecer, ba Comissão B ho prazo de 10 dias, tanba Comissão A liga ho serviços municipais nian ne'ebé tem a ver com coordenação iha questões segurança civil nian. E tanba saida mak prazo 15 dias? Governo iha ninia carta de submissão ba proposta ne'e hussu carácter urgência, maibé iha exposição de motivo la pronuncia buat ida, mas enquanto ha'u haree lei ne'e la'ós alteração buat ruma, e barak tebetebes que parece precisa audiências públicas mais alargadas ho várias instituições diferentes, maibé ba apreciação inicial ne'e, tanba ne'e mak ha'u fó prazo 15 dias, no mínimo, e, liu ida-ne'e ita hein relatório e parecer.

Nune'e, ha'u convida Mesa Comissão B atu mai foti proposta ne'e.

Iha ponto de ordem ida: Distinto Deputado Vasconcelos.

Sr. Francisco de Vasconcelos (PLP): — Obrigado, Sr. Presidente.

Ha'u hanoin iha agenda ida daudauk Presidente pronuncia ne'e, ha'u hanoin se bele ita hussik lai karik, tanba Presidente Comissão sira la iha-ne'e. Vice? Ha'u hanoin ita resolve tiha lai karik. Ha'u la hatene, ne'e ha'u-nia opinião, ha'u la iha problema, mas Presidente Comissão sira la iha. Ha'u hanoin ita halo plenária extra ida, depois de ita resolve tiha constituição mesa comissão sira-ne'e, se lai orsida hamossu iha interpretação.

Sr. Presidente: — Distinto Deputado Bianco: ponto de ordem.

Sr. Antoninho Bianco (FRETILIN): — Ha'u hanoin, Sr. Presidente, baixa ba comissão ne'e, se estrutura laran Vice iha assume responsabilidade, ita labele hein malu tanba Estado labele hein malu. Plenária iha ona, hatún, se Vice la iha Secretária assume, tanba atu halo serviço ne'e la'o mak ita halo esforço ne'e. Ne'ebe, baixa ba Comissão, Comissão B ninia Vice iha bele foti, nune'e mós Comissão A, ninia Vice iha bele foti.

Obrigado.

Sr. Presidente: — Obrigado.

Srs. Deputados, Parlamento ne'e funciona ho maioria, deliberação mós hola ho maioria, ne'ebé se la marca presença hanessan ohin iha Plenária mós... Plenário, desde que preenche quórum funcionamento, mós la'o e bele mós hola decisão iha Parlamento ne'e, tanba iha quórum de deliberação, hanessan mós ho Comissão. Comissão existe nafatin.

Agora, se iha membro da Mesa Comissão sira-ne'e mak la marca presença iha-ne'e ka iha Comissão ne'ebá, tuir ita-nia Regimento ne'e se Presidente la iha Vice Presidente assume, Vice Presidente la iha... Secretária la dirige mesa, maibé serviço administrativo ne'e kala Secretária... Mas só para atu simu baixa ida-ne'e, até membro Comissão ida mós bele mai. Agora, se iha Comissão ne'ebá atu iha alteração Mesa Comissões, ne'e iha qualquer hora bele halo.

Então, Mesa decide ohin baixa nafatin, iha membro Comissão B ruma iha-ne'e bele mai. Vice-Presidente assume. Hussi Comissão A Distinto Deputado Vasconcelos, Vice-Presidente Comissão A.

Então, Proposta de Lei Proteção Civil baixa hotu ona.

Antes ita encerra, Sr. Secretário de Estado iha ponto ruma atu hato'o tan.

Sr. Secretário de Estado para a Comunicação Social (Merício Juvinal dos Reis): — Obrigado, Sr. Presidente.

Clarifica de'it ohin como ha'u dehan tanba encontro Conselho de Ministro seidauk hotu... Ne'ebe, ohin ha'u dehan possibilidade atu estende, maibé como daudaun ne'e Conselho Ministro hotu ona e Conselho de Ministros aprova tiha ona katak ita estende estado de emergência, orsida mais detalhe informação sei sai hussi porta-voz Conselho de Ministros.

Ida-ne'e de'it mak ha'u hakarak clarifica.

Obrigado.

Sr. Presidente: — Obrigado, Sr. Secretário de Estado.

Srs. Deputados, ohin iha abertura, ha'u hatete agenda ida ba destituição ho eleição Secretária ne'e atu tau ba loraik, mas agora ha'u hussu ba bancadas parlamentares, se agora ita bá intervalo hanessan merenda, hotu tiha sei bele apresenta, mai ita bele resolve, antes ita bá hora de almoço mós di'ak.

Favor, Bancadas Parlamentares pronuncia kona-ba ida-ne'e.

Sr. Francisco Miranda Branco (FRETILIN): — Sr. Presidente, administrativamente ami reúne ona condições, agora ami recolhe hela assinatura, intervalo ita tama, ita bele resolve tiha situação ida-ne'e.

Obrigado, Sr. Presidente.

Sr. Presidente: — Então, Srs. Deputados, Mesa hein, maibé Mesa mós precisa, no mínimo, 15 minutos atu verifica ninia requisito sira ba candidatura ho requerimento ne'ebé tama, tanba

tem que iha fase rua: fase ida ba destituição no destituição hotu tiha mak fase tuirmai ... Se halo apresentação ba requerimento rua ne'e dala ida de'it mós la iha problema, e Mesa dentro de 15 a 20 minutos bele verifica e halo despacho, bele halo admissão ba requerimento sira e ita bele realiza.

Halo favor, distinto Deputado.

Sr. Francisco Miranda Branco (FRETILIN): — Sr. Presidente, sei recolhe assinaturas, ha'u hanoin di'ak liu ita tama lai intervalo, depois documentos sei entrega ba Mesa da Presidência hodi verifica, e depois de intervalo ne'e ita bele tama ona ba destituição no eleição.

Sr. Presidente: — Obrigado. Ita ba intervalo hanessan pausa ba hola merenda, 15 minutos ita hassoru malu fali iha-ne'e.

Obrigado.

Horas hatudu tuku 11 liu minuto 02, no sessão hahú filafali bainhira horas hatudu tuku 11 liu minuto 36.

Sr. Presidente: — Boa tarde Srs. Deputados. Ita hassoru malu fali ba segundo ponto agenda Plenária ohin nian que era para halo destituição no eleição ba Secretária sira hodi completa Mesa Parlamento Nacional nian.

Mesa simu ona requerimento balu iha-ne'e, requerimento ba destituição ho requerimento ba candidaturas. Tuir Regimento, hanessan mós ba eleição Vice-Presidente, candidatura sira tem que tama 24 horas de antecedência. Horibainhira ita iha eleição ba Presidente ne'e, tanba circunstâncias, momento ne'e la permite ita atu adia, então Plenária obrigatoriamente halo deliberação, baseia ba deliberação ida-ne'e mak ita halo kedas eleição ba Presidente.

Agora, ita-nia circunstâncias ohin ne'e, sem presença hussi Bancada oposição ka Bancada CNRT ho partido Bancada sira seluk, mós tanba iha situação ida que labele justifica katak ita bele halo deliberação lalais para ita halo destituição ho eleição Secretária foun lalais.

Então, Mesa decide adia ba sessão plenária aban, terça-feira nian. Aban terça-feira ne'e sei iha agenda hanessan baibain, iha período antes ordem do dia, ida-ne'e tama kedas ho relatório

anual Comissário CAC nian, está agendado, ho transmissão direta, então para cumpre ida 24 horas ne'e, ida destituição ho eleição ba Secretária atu completa Mesa ne'e hela ba aban loraik, maibé dadeer-saan tem que tama hotu ona iha agenda ba sessão aban terça-feira nian. Ne'ebe iha sessão loraik nian mak foin bele realiza requerimento sira-ne'e, tanba nia requisitos ida 24 horas ne'e.

Nune'e, ita adia kedas ponto agenda ida-ne'e ba plenária terça-feira, aban, ninian. Tanba ohin ita-nia agenda seluk la iha ona, sessão plenária ohin terça-feira nian...

Sr.^a **Olinda Guterres** (KHUNTO): — Ponto de ordem!

Sr. **Presidente**: — Ha'u atu taka ona. Sr.^a Deputada: ponto de ordem.

Sr.^a **Olinda Guterres** (KHUNTO): — Obrigado ba oportunidade.

Sr. Presidente, ha'u hanoin kona-ba Secretária da Mesa nian ne'e, troca de'it naran ne'e ha'u hanoin la lori tempo naruk ida. Troca de'it naran para aban ita tama fali serviço seluk. Naran hussi KHUNTO de'it mak la naran sá iha-ne'e, maibé colega sira seluk hussi parte sorin ne'e, ami mak haruka fali ba iha-ne'ebá. Ne'ebe, troca de'it naran ne'e la custa ida, Sr. Presidente, do que dada to'o aban, agora horas ne'e ita halo saida.

Obrigada, Sr. Presidente.

Sr. **Presidente**: — Obrigado, Sr.^a Deputada.

Requerimento ami simu tiha ona, liuliu candidato sira-ne'e. Mas se iha tan troca naran, bancada parlamentar sira tem que halo entendimento, não é? E nune'e Bancada PD mós iha-ne'e, karik sei atu halo entendimento ho Bancada PD, certeza que precisa tempo. Agora, se ita acelera lailais... Ba sessão dadeer nian ne'e de'it, ita agora iha 12 h 47, se adia ba loraik mós questão ida 24 horas de antecedência ne'e. Tanba ne'e mak Mesa decide atu adia kedas ba sessão plenária aban. Agora, aban ne'e tau ba dadeer ka loraik, ne'e orsida Mesa sei haree.

Nune'e, ha'u declara encerra sessão plenária ohin, segunda-feira dia 25 de maio de 2020 nian. Ita hassoru malu fali aban, sessão plenária terça-feira nian.

Bom almoço e boa tarde.

Agradece ba Sr. Deputado sira, Srs. Vice-Presidentes, Sr.^a Secretária ho assistente sira ne'ebé ohin mai assiste Plenária.

Obrigado tan dala ida e boa tarde.

Horas hatudu tuku 12 liu minuto 49.

DIVISÃO DE REDAÇÃO, AUDIOVISUAL, TRANSCRIÇÃO E DOCUMENTAÇÃO.